

Sarajevo, 19.10.2021.godine

Klub zastupnika SDP BiH u Zastupničkom domu  
Parlamentarne skupštine BiH  
zastupnik, Nermin NikšićZA:  
**BOSNA I HERCEGOVINA**  
**PARLAMENTARNA SKUPŠTINA BOSNE I HERCEGOVINE**  
**ZASTUPNIČKI DOM**  
n/r Predsjedavajućeg ZD Parlamentarne skupštine BiH

U skladu sa članovima 7.8. i 9. Poslovnika o radu Zastupničkog doma Parlamentarne skupštine Bosne i Hercegovine, postavljam:

### ZASTUPNIČKO PITANJE

#### Prema Komisiji za očuvanje nacionalnih spomenika Bosne i Hercegovine

Postavljam pitanje i tražim od Komisije za očuvanje nacionalnih spomenika Bosne i Hercegovine da odgovori zašto, kada i sa kojim ciljem su otvoreni uredi u Banja Luci i Mostaru, ko koristi ove urede i u koju svrhu, te koliki su godišnji troškovi funkcionisanja ovih ureda, uključujući izdatke za plate uposlenih, najam i sve druge vezane troškove?

Također, tražim da mi se odgovori sa kojim ustavnim i zakonskim kapacitetom odlučuje krnja Komisija za očuvanje nacionalnih spomenika Bosne i Hercegovine, s obzirom da je i ustavno neutemeljena Odluka Predsjedništva Bosne i Hercegovine br. 01-50-1-2062-19/16 (Službeni glasnik BiH, broj 42/16) kojom je definisano da tročlana Komisija bez dvoje međunarodnih članova svoje Odluke usvaja „konsenzusom svih članova“ prestala da vrijedi još 30.05.2017. godine?

### OBRAZLOŽENJE:

Jednoglasnom Odlukom Predsjedništva Bosne i Hercegovine br. 01-50-1-2062-18/16 iz 2016. godine međunarodni članovi Komisije za očuvanje nacionalnih spomenika Bosne i Hercegovine (Komisija), prof. dr Martin Cherry i prof. dr Zeynep Ahunbay su razriješeni, odnosno izbačeni iz ovog tijela uspostavljenog Aneksom 8 Općeg okvirnog sporazuma za mir u Bosni i Hercegovini. Spomenutim Aneksom je precizno određeno da se Komisija sastoji od 5 članova, od kojih su dva međunarodna člana. Predmetnom Odlukom i svođenjem Komisije na tri bosanskohercegovačka člana je došlo do očitog kršenja Općeg okvirnog sporazuma za mir u Bosni i Hercegovini. Na neustavnost ove Odluke Predsjedništvu BiH je ukazao i OHR, što je bio i jasan odgovor Visokog predstavnika u Bosni i Hercegovini na upit o navedeno problemu koji je ranije postavio zastupnik Saša Magazinović.

Dodatno, iako je za usvajanje Odluka Komisije bilo nužno dobiti podršku barem jednog međunarodnog člana, popratnom Odlukom Predsjedništva Bosne i Hercegovine br. 01-50-1-2062-19/16 utvrđeno je da Komisija svoje Odluke usvaja „konsenzusom svih članova“, te je određeno da Odluka vrijedi do 30.05.2017. godine.

S obzirom da je spomenuta Odluka o načinu odlučivanja Komisije prestala da važi prije više od četiri godine, smatram da je nužno da Komisija obrazloži u kojem sastavu radi i na osnovu kojeg pravnog akta donosi Odluke nakon 30.05.2017. godine?

Također, posebno je važno da iz Komisije obrazlože potrebu za otvaranjem ureda u Banja Luci i Mostaru, koja nije postojala kada je Komisija djelovala u punom sastavu prethodnih dvadeset godina, a sada se navodno javlja potreba za otvaranjem novih ureda. Tražim da mi se zato obrazlože razlozi za otvaranje ova dva ureda, način i svrha njihove upotrebe, kao i troškovi kojim su građani izloženi zbog ovog poteza koji vrlo izgledno ima isključivu političku funkciju razdjeljivanja i degradiranja Komisije za očuvanje nacionalnih spomenika Bosne i Hercegovine na tri etničke kancelarije i redefinisanja Općim okvirnim sporazumom za mir priznate jedinstvene bosankohercegovačke nacionalne kulturne baštine kao tri odvojene etničke kategorije.



Nermin Nikšić,  
Zastupnik u Zastupničkom domu Parlamenta BiH